

યાકૂબા લોખલાં પત્ર પ્રસ્તાવના

યાકૂબા લોખલાં પત્ર કોવે-કોવે ચાલ “નોવા નિયમા નીતિવચન” આખલા જાહે, યાકૂબા ચોપડી વ્યવહારિક રૂપથી એને બોરહાથી ખ્રિસ્તી લોકહાન યાદ દેહે કા કેહેકેન જીવના હેય, મજબુતથી હાચ્યાં બોરાહા થી કાદાબી જીબેલ તાબામાંય રાખાંહાટી, પોરમેહેરા ઇચ્છા પ્રતિ સમર્પિત ઓઅના, એને ઈમાત રાખના, ઈ ચોપડી વાચનારાલ ખ્રિસ્તાહાટી ઓદિકારી રુપામાય એને બુદ્ધીમાનેકોય જીવનામાય હાંબાળ કોઅહે, કોલહાક લોકહાય દાવો કોઅયો કા યાકૂબ એને પ્રેષિત પાઉલ વિસ્વાસા વિરુદ્ધ કામહા સવાલાહાવોય આલાગપણા રાખતાહા બાકી વાસ્તવમાય યાકૂબ જ્યા આત્મિક ફોળહા બારામાય વાત કોઅહે, તો ચ્યા હાચ્યાં બોરહાલ દેખાડેહે જ્યા બારામાય પાઉલાય લોખ્યાં, ચ્યા લોખના પરસ્પર વિરોદ્ધ કોઅનાથી હારકા હેય, નોવા નિયમા લોખનામાથી બોદહા પેલ્લા લોખના (ઇસવી સન 40-50), એહેકોય માનલા જાહે કા ઈ ચોપડી ઈસુ બાહા યાકુબથી લોખલી ગીઅલી હેય (ગલાતી. 1:19).

સલામ

¹ આંય યાકૂબ હેય, જો પોરમેહેર એને પ્રભુ ઈસુ ખ્રિસ્તા સેવક હેતાંવ, આંય ઈ પત્ર ઈસરાયેલા બાર કુળહાલ લોખી રિયહો જ્યા બોદા દુનિયામાય વિખરાલા હેય, ઈસરાયેલા બાર કુળહાલ સલામ.

પરિક્ષાયેહે મહત્વ

² ઓ મા બાહાબોઅયેહેય, જોવે તુમહેવોય બોદયે જાત્યે પરીક્ષાયો યેય, તે તુમા યા મોઠા આનંદા વાત હોમજાં.

³ કાહાકા તુમા જાંઅતાહા, કા જોવે તુમહે બોરહો પારખાલો જાહે, તોવે તુમહે ધીરજ વોદી એને તુમા આબદાયેહેલ સહાન કોય હોકાહા.

4 યાહાટી પરીક્ષાયે વોચ્યે ઈસુવાવોય આપહે બોરહો બોનાડી રાખા, કા તુમા આત્મિક રીતે મજબુત એને સિદ્ધ ઓઅય જાં એને તુમહામાય કોઅયેહેબી હાર્યે વાતે કમી નાંચ રોય.

5 બાકી જો તુમહેમાઅને ચોકતાલ બુદ્યે કોમી હેય, તે પોરમેહેરાપાઅને માગા, તો ઠપકો દેયા વોગાર બોદહાન ઉદારતાથી દેહે, એને તો ચ્યાલ દેઅરી.

6 બાકી તુમા માગતાહા તે બોરહો રાખીન માગના એને કાય શંકા નાંચ કોઅના, કાહાકા જો શંકા કોઅહે તો દોરિયા લાફા હારકો હેય જીં વારે કોય વોવહે એને ઉસળેહે.

7 ઓહડા માઅહાય ઈ આશા બીલકુર નાંચ રાખના કા ચ્યાલ પ્રભુ પાઅને કાય મિળરી,

8 કાહાકા તો ચ્યા મોન બોદાલતો રોહે એને પોતાના વાતમાય મજબુત નાંચ રોય.

મિલકાતવાળો એને ગરીબ

9 જો વિસ્વાસી ગરીબ હેય ચ્યાય ખુશ ઓઅરા જોજે કા પોરમેહેરાય ચ્યા સન્માન કોઅયોહો.

10 એને જો વિસ્વાસી મિલકાતવાળો હેય તો પોતાના નીચ દશાવોય, કાહાકા તો ગાહીયા કુલા હારકો મિટાય જાય.

11 દિહી નિંગતાંજ વોદારે તીડકો પોડહે એને ગાહીયા ઉખાડી દેહે, એને ચ્યા કુલ ટુટી પોડહે, એને ચ્યા સોબા જાતી રોહે, ચ્યા હારકા, ચોક મિલકાતવાળો વિસ્વાસી બી મોઅઇ જાય, જોવે ચ્યા પોતાના કામ કોઅનામાંયજ લાગી રોહે.

પોરમેહેર પરીક્ષા નાંચ લેય

12 ઘન્ય હેય તીં માઅહું, જો પરીક્ષામાય ટોકી રોહે, કાહાકા જોવે તો પરીક્ષા માઅને હાચ્યો સાબિત ઓઅહે તે તો અનંતજીવના મુગુટ મેળવી, જ્યા વાયદો પોરમેહેરેય ચ્યાન કોઅયોહો જો ચ્યાલ પ્રેમ કોઅતેહે.

13 જોવે કાદા પરીક્ષા ઓઅે, તે તો એહે નાંચ આખે, કા મા પરીક્ષા પોરમેહેરાપાઅને ઓઅહે, કાહાકા પોરમેહેરા કોદહીબી ખારાબ વાતહેથી પરીક્ષા નાંચ ઓઅે, એને નાંચ તે પોરમેહેર કાદા પરીક્ષા કોઅહે.

14 બાકી હર ચોક માઅહું પોતેજ ખારાબ ઇચ્છાયેહેમાય ખેચાય ને લાલચાયને ફસાઇન પરીક્ષાયેહેમાય પોડી જાહે.

15 યા પાછે, જોવે તો પાપ કોઅરા યોજનાયે વિચાર કોઅહે, તે પાપા જન્મો ઓઅહે, એને પાપ વોદી જાહે, પાછે યા પરિણામ અનંતકાળ મોરણ ઓઅહે.

16 ઓ મા પ્રિય બાહાબોઅયેહેય, છેતરાયાહા મા.

17 કાહાકા બોદા ચોક હારાં વરદાન એને બોદા ચોક ઉત્તમ દાન આમહે પોરમેહેર આબહા પાઅને મિળહે, જ્યાંય આકાશામાય બોદાંજ ઉજવાડો દેનારાહાન બોનાડ્યા, પોરમેહેર કાચામ ચોક હારકો હેય, એને તો સાવડા હારકો નાંચ બોદલાય.

18 ચ્યાયુ પોતાનાજ ઇચ્છાયે કોય આમહાન હાચ્યાયે વચનાકોય પોતે પોર્હે બોનાડ્યે, કા આમા બોદા વિસ્વાસી ચ્યાથી બોનાડલી ગીયલી બોદી ચોક વસ્તુહું બોદહાથી મહત્વા ભાગ હેતા, જેહેકોય પાકલા અનાજા પેલ્લા ફળ બોદહાથી મહત્વા ભાગ ઓઅહે.

વોનાના એને ચ્યાવોચ ચાલના

19 ઓ મા પ્રિય બાહાબોઅયેહેય, ઈ વાત તુમા જાંઆય લા, હર ચોક માઅહું વોનાયા હાટી તેજ એને બોલવામાય ધીર એને ગુસ્સામાય દિમો ઓઅે.

20 કાહાકા જોવે કાદાં માઅહું ગુસ્સો કોઅહે, તે તી પોરમેહેરાલ ખુશ નાંચ કોય હોકે.

21 યાહાટી બોદી મલીનતા એને વેર-ભાવ વોદના દુર કોઇન, ચ્યા પોરમેહેરા વચનાલ નમ્રતાકોય માની લે, જું તુમહે રુદ્યામાય વોઅલા ગીયા એને જું તુમહે જીવા તારણ કોઅય હોકહે.

22 બાકી પોરમેહેરા વચન પાળનારા બોના, એને ફક્ત વોનાનારાજ નાંચ જ્યા પોતાલ દોગો દેતહે.

23 કાહાકા જો કાદો વચન વોનાનારોજ ઓઅે, એને ચ્યાલ પાળનારો નાંચ ઓરી, તે તો ચ્યા માઅહા હારકો હેય જો પોતાના સ્વભાવિક મુંચ આરહામાય એઅહે.

24 યાહાટી કા તો પોતાલ એઇન જાતો રોહે, એને તારાત વિહીરાય જાહે કા તો કોહડો આતો.

25 બાકી તી માઅહું જીં પોરમેહેરા પુરાં નિયમાલ દિયાનથી મનન કોઅહે, જો લોકહાન પાપથી છોડાવેહે, તી માઅહું વોનાઈન વિહીરાનારા નાંય બાકી પાલન કોઅહે, ઓહડા માઅહાન પોરમેહેરા ચ્યા હર-યોક કામહામાય બોરકાત દેઅરી.

ભક્ત્યે હાચ્ચી વાટ

26 જો કાદો પોતાલ પોરમેહેરાલ આદર કોઅનારો હુમજે, એને તો ખારાબ વાતો બોલવામાય જીબ કોબજે નાંય રાખે, તો પોતાના દોગો દેહે એને ચ્યા ભક્તિ નકામી હેય.

27 આમહે પોરમેહેર આબાપાય ચોખ્ખી એને નિર્મળ ભક્તિ ઈ હેય, કા અનાથાહા એને વિધવાયેહે દુઃખામાય ચ્યાહા ખોબાર લે, એને પોતાલ યા દુનિયા ખારાબ કામહાથી ઉસરાય નાંય જાં દેયના.

2

ભેદભાવા પાપ

1 ઓ મા બાહાબોઅયેહેય, તુમા આપહે મહિમામય પ્રભુ ઈસુ ખ્રિસ્તાવોય બોરહો રાખતાહા યાહાટી તુમહામાય ભેદભાવા વિચાર નાંય રોય.

2 દાખલાહાટી જો યોક માઅહું હોના મુંદી એને સોબાર્તે ફાડકે પોવીન તુમહે સોબાયેમાય યેહે, એને યોક ગોરીબ બી મેલે ચોડનાલે ફાડકે પોવીન યેહે.

3 એને તુમા ચ્યા સોબાર્તે ફાડકાવાળાલ વદારે માનપાન દેયને આખે, “તું ઈહીં હારાં જાગાવોય બોહો,” એને ચ્યા ગરીબાલ આખે, “તું તાંજ ઉબો રો,” કા “મા પાગહા ઈહીં યેયન નિયે બોહો.”

4 તે કાય તુમાહાય ચોકા-બિજા ભેદભાવ નાંય કોઅયોહો એને કાય તુમા ખારાબ વિચારાહાકોયન ન્યાય કોઅનારા નાંય બોન્યાહા?

5 ઓ મા પ્રિય બાહાબોઅયેહેય વોનાયા, પોરમેહેરાય ચ્યા લોકહાન નિવાડલા હેય, જ્યા યા દુનિયા નોજરેમાય ગરીબ હેય, યાહાટી કા બોરહામાય મિલકાતવાળા ઓઅઈ જાય એને ચ્યા રાજ્યા વારસો બોને, જ્યાથી પોરમેહેરાય આપહે પ્રેમ કોઅનારાહાન દેયના વાયદો કોઅયોહો.

6 બાકી તુમહાય ચ્યા ગરીબા અપમાન કોઅયાહાં, તુમા જાંઅતાહા કા યા મિલકાતવાળાજ લોક હેય જ્યા તુમહેવોય જુલુમ કોઅતાહા, એને ચ્યાજ હેતા જ્યા તુમહાન બળજબરી કોય કોયરીમાય લેય જાતહા.

7 ચ્યા ચ્યાજ હેય જો ઈસુ ખ્રિસ્તા ઉત્તમ નાંવા વિરુદ્ધ ખારાબ વાતો બોલતેહેં, જ્યાવોય તુમા સબંધ રાખતાહા.

8 જો તુમા ચ્યા ખાસ નિયમા આગનાયેહેલ પુર્યો કોઅતાહા જ્યો પવિત્રશાસ્ત્રમાય લોખલ્યો હેય, “કા તું પોતાના પોડુસીવોય પોતે હારકો પ્રેમ રાખ,” તે તુમા હારાં કોઅતાહા.

9 બાકી તુમા ભેદભાવ કોઅતાહા, તે તુમા પાપ કોઅતાહા, એને નિયમ તુમહાન દોષી ઠોરવેહે.

10 કાહાકા જો કાદો બોદા નિયમાહા પાલન કોઅહે, બાકી જો ચોક આગના બી તોડી દેહે, તે તો બોદ્યે વાતહેમાય દોષી ગોણલો જાહે.

11 યાહાટી કા જ્યાંય ઈ આગના દેનહી, “તું વ્યભિચાર નાંય કોઅના,” ચ્યાય ઈ બી આગના દેનહી, તું ખૂન નાંય કોઅના યાહાટી જો તુયે વ્યભિચાર તે નાંય કોઅયા, બાકી ખૂન કોઅયા તેરુંબી તુયે નિયમાહા પાલન કોઅનારો નાંય ઠર્યોહો.

12 યાહાટી તુમા ચ્યા લોકહા હારકા બોલા એને દયાકોય કામબી કોઆ, જ્યાહા ન્યાય નિયમાનુસાર કોઅલા જાય જું આમહાન છોડાવેહે.

13 કાહાકા જ્યાંય દયા નાંય કોઅયહી, ચ્યા દયા વોગાર ન્યાય ઓઅરી, દયા ન્યાયાવોય જીત મેળવી.

બોરહો એને કામ

14 ઓ મા પ્રિય બાહાબોઅયેહેય, જો ચોકતો આખે કા આંય પ્રભુ ઈસુ ખ્રિસ્તાવોય બોરહો કોઅહુ બાકી તો હારેં કામે નાંય કોઅે, તોવે યાકોય કાય ફાયદો? કાય ઓહડો બોરહો કોવે ચ્યા તારણ ઓઅય હોકહે.

15 જો ચોકતા વિસ્વાસી બાહા યા બોઅયેહેલ ફાડકાહા જરૂરત ઓઅે, એને ચ્યાહાન રોજ-દિહી ખાઅના કોમી ઓઅે,

16 એને તુમહેમાઅને યોકતો ચ્યાહાન આખહે, “શાંતિથી જો, તુમા તાતા રા એને દારાલા રા,” બાકી જ્યો વસ્તુ શરીરાહાટી જરુરી હેય જો તુમા ચ્યેહેન નાંય એએ, તે કાય ફાયદો.

17 તેહેકેન બોરહો બી, જો હારાં કામહાહાતે નાંય ઓએ તે આપા જીવ વગરના હેય.

18 બાકી કાદો આખી હોકે, “તુલ બોરહો હેય, એને આંય હારેં કામે કોઅતાહાંવ,” બાકી આંય આખતાહાવ, તું માન સાબિત કોઓ કા તુલ હારેં કામ કોઅયા વોગાર બોરહો હેય, એને આંય આપહે બોરહો આપહે હારેં કામ કોઅવાથી તુલ સાબિત કોયદિહી.

19 તુલ બોરહો હેય કા ચોકુજ પોરમેહેર હેય, તે તું હારાં કોઅતોહો, બુતડે બી બોરહો રાખતે, એને બીઈન કાપતેહેં.

20 બાકી ઓ મૂર્ખ માઅહાય કાય તું ઈ બી નાંય જાંએ, કા હારાં કામહા વોગાર બોરહો નોકામ્યો હેય?

21 નોકકીજ આમહે આગલ્યા ડાયો આબ્રાહામ, પોતાના પોહો ઈસાકાલુ વેદેવોય ચોડવીન આપહે હારેં કામહાથી પોરમેહેરા હામ્મે ન્યાયી ઠોરાવલો ગીયો.

22 તુમાહાય એએઈ લેદા કા બોરહાય આબ્રાહામા કામહાહાતે મિળીન પ્રભાવ ટાક્યોહો એને ચ્યાય જી કોઅયા ચ્યાથી ચ્યા બોરહો પુરો ઓઅયો.

23 એને પવિત્રશાસ્ત્રા ઈ વચન હાચ્યાં ઓઅયા, “આબ્રાહામાય પોરમેહેરાવોય બોરહો કોઅયો, એને ચ્યા બોરહા લીદે પોરમેહેરાય ચ્યાલ ચોક ન્યાયી માઅહું ઠોરવ્યો” એને તો પોરમેહેરા મિત્ર આખાયો.

24 તુમાહાય એએઈ લેદા કા માઅહું કેવળ બોરહાકોયજ નાંય, બાકી હારાં કામહાથી બી ન્યાયી ઠોરહે.

25 તેહેકોનુજ રાહાબ વેશ્યાબી જોવે ચ્યેય જાસુસાહાન પોતાના ગોઅમે રાંહાટી જાગો દેનો, એને બિજ્યે વાટેથી દોવાડી દેના, તે તી પોતાના કામહાથી ન્યાયી ઠોરી.

26 જેહેકોય શરીર શ્વાસ વોગાર મોઅલા હેય તેહેકોયનુજ બોરહો બી હારાં કામહા વોગાર મોઅલો હેય.

3

જીબ યોક આગ

1 ઓ મા બાહાબોઅયેહેય, તુમહામાઅને બોજ જાંએ મંડળ્યેમાય પોરમેહેરા વચન હિકાડના શિક્ષક નાંય બોને, કાહાકા તુમા જાંઅતાહા, કા બીજહા તુલનામાય હિકાડનારાહા ન્યાય એને આજુ વોદારે કોઠોરતાથી કોઅલી જાય.

2 આમા બોદે બોજ વોખાત ચુકી જાજહે જો કાદો વચનામાય નાંય ચુકે, તે તી સંપુર્ણ માઅહું હેય, એને તો પોતે શરીરાવોય પુરે રીતેકોય કાબુ કોરાહાટી સક્ષમ હેય.

3 જોવે આપા ગોડહાન આપહે કાબુમાય કોઅરાહાટી ચ્યા મુયામાય લગામ લાવતાહા, તોવે આમા ચ્યા બોદા શરીરાલ બી ફેરવી હોકતાહા.

4 એઆ, જાહાજ બી, ભલે ઓહડે મોઠે રોતેહે, એને વદારે વારાથી ચાલાડલે જાતહે, તેરુંબી યોક વાહના સુકાનથી જાહાજ ચાલાડનારા ઇચ્છા નુસાર ફિરાવલા જાહે.

5 યે રીતે જીબ બી યોક શરીરા હાનો ભાગ હેય બાકી મોઠી-મોઠી વાતહે ઘમંડ કોઅહે, એઆ કેહેકેન, યોક વાહના સીનગા યોક મોઠયે જાડયેલ હોલગાડી દેહે.

6 જીબ બી યોક આગ્યે હારકા હેય, ઈ તે જુઠી દુનિયા હેય શરીરા જો ભાગ હેય જી બોજ ખારાબ હેય એને જી આમહે શરીરાલ અશુદ્ધ કોય દેહે. ઈ આમહે પુરાં જીવનાલ નરકા કોવ્યે માઅને યેનારી આગડાકોય નાશ કોઅય હોકહે.

7 બોદા પ્રકાર જંગલી જોનાવરે, ચિડે, હોઅપલીન ચાલનારે જંતુ એને દોરિયામાય રોનારે જંતુ તે માઅહા જાત્યે કોબજામાય ઓઅય હોકતેહે એને ઓઅય બી ગીયહે.

8 બાકી જીબેલ માઅહા માઅને કાદોબી કોબજામાય નાંય કોય હોકે, તી યોક ઓહડી ખારાબ હેય જી કોદહી રોકાયજ નાંય, તી યોક જેરીવાળા હાપડા જેરે હારકી બોજ નુકસાન કારક રોહે.

9 જીબીકોય આપા પ્રભુ એને આબહા સ્તુતિ કોઅજેહે, એને યાકોય માઅહાન જી પોરમેહેરા રુપામાય બોનાડલે ગીઅલે હેય હારાપ દેતહે.

10 યોકાજ મુયાકોય સ્તુતિ એને હારાપ બેની નિંગતેહે, ઓ મા બાહાબોઅયેહેય, એહેકોય નાંય ઓરા જોજે.

11 કાય જોરા યોકાજ મુયામાઅને ગુળાં એને ખારાં પાઆય બેની નિંગતેહે?

12 ઓ મા બાહાબોઅયેહેય, કાય અંજીરા જાડામાયને જેયતુના ફળ, યા દારાખા વાડયેમાય અંજીર લાગી હોકહે? તેહેકોયનુજ ખારાં જોરામાઅને ગુળા પાઆય નાંય નિંગી હોકે.

હાચ્યાં અંતકરણ

13 તુમાહામાય ઓકાલવાળો એને હોમાજદાર કું હેય? જો તુમા ઓએ, તે તુમહાન ઈ યોક હારાં જીવન જીવનાથી, એને ચ્યે નમ્રતાઆરે જીં તુમહે ઓકાલકોય યેહે હારેં કામે કોઇ દેખાડાં જોજે.

14 બાકી જો તુમા પોત-પોતે મોનામાય બોજ ઓદરાય એને સ્વાર્થ રાખતાહા, તે ઘમંડ નાંય કોઅના, એને નાંય તે હાચ્યાયે વિરુદ્ધમાય જુઠા બોલના.

15 ઈ ઓકાલ તી નાંય, જીં પોરમેહેરાપાઅને હેય બાકી દુનિયાદારીક, એને શારીરિક, એને સૈતાનિક હેય.

16 યાહાટી કા જાં ઓદરાય એને સ્વાર્થ ઓઅહે, તાં જગડો એને બોદા પ્રકારા ખારાબુ કામ ઓઅહે.

17 બાકી જીં ઓકાલ પોરમેહેરાપાઅને યેહે તી પેલ્લા તે પવિત્ર ઓઅહે પાછે શાંતી ફેલાવનારો, હારાં એને બુદ્ધિવાળો એને દયા એને હારેં કામાહાકોય બોઆલો એને ભેદભાવ વગર એને ઈમાનદાર ઓઅહે.

18 એને જો મેળ-મિળાપ કોઅનારો હેય તો શાંત્યે બિચારો વોઅરી એને ન્યાયપણા પાક વાડરી.

4

દુનિયાઆરે મિત્રતા

1 તુમહામાય લોડાય એને જગડો કેસને યેતહા? ઈ ચ્યે સ્વાર્થી ઇચ્છાકોય યેતહે જીં તુમહેમાય જુલાતેહે.

2 તુમા ઇચ્છા કોઅતાહા, બાકી તુમહાન નાંય મીળે યાહાટી તુમા યાલ મિળવાહાટી ખૂન કોઅતાહા, એને તુમા લોબ કોઅતાહા બાકી કાયજ

નાંચ મિળવેત. યાહાટી તુમા લોડાય જગડો કોઅતાહા, તુમહાન યાહાટી નાંચ મીળે; કાહાકા તુમા યાલ પોરમેહેરાપાઅને નાંચ માગેત.

³ તુમા માગતાહા તેરુંબી તુમહાન નાંચ મીળે, કાહાકા ખારાબ ઇચ્છાકોય માગતાહા, યાહાટી કા આપહે મોજ-મોજ્યામાય ઉડવી દા.

⁴ ઓ વિશ્વાસઘાત કોઅનારા લોકહાય, કાય તુમા નાંચ જાંએતકા યા દુનિયાઆરે મિત્રતા કોઅનાથી પોરમેહેરાઆરે આડાઇ કોઅના હેય? યાહાટી જો કાદો યા દુનિયા મિત્ર ઓરા માગે, તો પોતે પોરમેહેરા આડો બોનાડેહે.

⁵ કાય તુમા ઈ વિચાર તે નાંચ કોઅય રીયાહા કા પવિત્રશાસ્ત્રા ઈ વચન મતલબ વગર હેય: “તી આત્મા, જ્યાલ ચ્યાય આમહે માજે બોહાડલાં હેય, મોઠી ઇચ્છાકોય આમહેહાટી ફિકાર કોઅહે”?

⁶ બાકી પોરમેહેર આમહાન ઓહડી ખારાબ ઇચ્છાયેહે વિરુદ્ધ ઉબા ઓઅરાહાટી આજુબી સદા મોયા કોઅહે યાહાટી પવિત્રશાસ્ત્રમાય ઈ લોખલાં હેય કા, “પોરમેહેર ઘમંડયાહાન વિરુદ્ધ કોઅહે, બાકી નમ્ર માઅહાવોય સદા મોયા કોઅહે.”

⁷ યાહાટી પોરમેહેરા આધીન ઓઅય જાં, એને સૈતાના સામનો કોઆ તોવે સૈતાન તુમહે ઇહીરે નાહી પોડી.

⁸ પોરમેહેરા પાહાય યા, તે તોબી તુમહે પાહાય યેઅરી: ઓ પાપી માઅહાય, આપહે જીવના માઅને પાપ દુઉ કોઆ એને ઓ મોન બોદાલનારા લોકહાય આપહે રુદ્ધ પવિત્ર કોઆ.

⁹ આપહે પાપહાહાટી દુઃખી ઓઆ, એને શોક કોઆ, એને રોડા, તુમહે ઓહના રોડનામાય એને તુમહે આનંદ નિરાશામાય બદલાય જાય.

¹⁰ પ્રભુ હામ્મે નમ્ર બોના, તે તો તુમહાન ઉયો કોઅરી.

¹¹ ઓ બાહાબોઅયેહેય, ચોક બિજા નિંદા મા કોઅહા, જો આપહે આર્યા વિસ્વાસી નિંદા કોઅહે, કા આપહે આર્યા વિસ્વાસીવોય દોષ લાવહે, તો નિયમા નિંદા એને નિયમાહા ન્યાય કોઅહે, બાકી તું નિયમા નિંદા કોઅતોહો, તે તું નિયમાહાન પાળનારો નાંચ, બાકી તું નિયમાહા ન્યાય કોઅનારો હેય.

¹² નિયમ દેનારો એને ન્યાય કોઅનારો તે ચોકુજ હેય તો પોરમેહેર હેય, જ્યામાય બોચાવના એને નાશ કોઅના શક્તિ હેય, બાકી તું કું

હેય, જો આપહે પડોશીવોય દોષ લાવતોહો?

ભવિષ્યા ચિંતા

13 તુમા જો ઈ આખતેહે, “આજે કા હાકાળ આમા કાદા બિજા ગાવામાય જાયને તાં ચોક વોરહા રોયન કામ કોયન માલમિલકાત કામાવુહુ.”

14 બાકી હાચ્યાઇ તે ઈજ હેય કા તુમહાન તે આપહે ચેનારો હાકાળ્યા જીવના બારામાય બી કાયજ નાંચ માલુમ હેય, તુમા તે દુમાડા હારકા હેય, જો વાયજ વાઆ લોગુ દેખાયેહે, પાછા નાંચ દેખાય.

15 યાહાટી તુમહાન એહેકોય આખા જોજે, જો પ્રભુ ઇચ્છા ઓએ, તે આમા જીવતા રોહુ એને ઈ કા તી કામબી કોઅહુ.

16 બાકી આમી તુમા આપહે અભિમાના યોજનાયે બારામાય ઘમંડ કોઅતાહા, ઓહડા બોદા ઘમંડ ખારાબ ઓએહે.

17 યાહાટી જો કાદો ભલાઈ કોઅના જાંઅહે એને નાંચ કોએ, ચ્યાહાટી ઈ પાપ હેય.

5

મિલકાતવાળહાન સલહા

1 ઓ મિલકાતવાળહાય વોનાયત લા, તુમા આપહે ચેનારા દુઃખાવોય બોંબલી-બોંબલીન રોડા.

2 તુમહે મિલકાત નાશ ઓઅય ગીયહી એને તુમહે ફાડકે ઉદાડાય ખારાબ કોઅય દેનહે.

3 તુમહે હોના ચાંદિલ કાટ લાગી ગીયોહો, એને તી કાટ તુમહે વિરુદ્ધ ચોક સાક્ષીદાર ઓઅરી, ઈ તુમહે શરીરાલ આગાડા હારકા હોલગાડી દેએરી. તુમહાય છેલ્લા દિહાહામાય મિલકાત બેગી કોઅયીહી.

4 એઆ, જ્યા મોજર્યાહાય તુમહે રાનામાય પાક વાડ્યા, ચ્યાહા મજરી જો તુમહાય ચ્યાહાન નાંચ દેનહી, ચ્યે તુમહે વિરુદ્ધ પોરમેહેરા હામ્મે બોંબલી રીયહે. ચ્યા મજર્યાહા વિનાંતી, સૈન્યાહા પ્રભુવાય વોનાય લેદલી હેય.

5 તુમા દોરતીવોય મોજ-મોજ્યામાય લાગી રિયા એને મોઠોજ સુખ બગવ્યો, તુમા ફક્ત આપહે મોજ-મોજ્યાહાટી જીવ્યાહા, એને યા

પ્રકારથી, તુમહાય પોત-પોતાલ પોરમેહેરાથી ન્યાય ઓઅરાહાટી માતીને તિયાર કોઅયાહાં.

⁶ તુમાહાય ન્યાયી માઅહાલ દોષી ઠોરવીન માઆઇ ટાક્યોહો, તો તુમહે વિરુદ્ધ નાંય કોઅે.

ધીરજ રાખના

⁷ યાહાટી ઓ બાહાબોઅયેહેય, પ્રભુ પાછા યેયના લોગુ ધીર રાખા, જેહેકોય, ખેડુત દોરત્યેવોયને બોજ હારાં ફળા આશા રાખતા પેલ્લા એને છેલ્લા વોરહાદ પોડના લોગુ ધીર રાખહે. યાહાટી કા પાક વાદે એને વાડાહાટી તિયાર ઓઅે.

⁸ આ હારકા તુમાબી ધીર રાખા એને આશા મા સોડહા કાહાકા પ્રભુ માહારુજ યેય રીયોહો.

⁹ ઓ બાહાબોઅયેહેય, ચોકા બિજાવોય દોષ મા લાવહા, યાહાટી કા તુમાહાવોય બી દોષ નાંય લાવલો જાય, ન્યાય કોઅનારા બોજ પાહી હેય એને યેયના તિયાર હેય.

¹⁰ ઓ બાહાબોઅયેહેય, જ્યા ભવિષ્યવક્તાહાય પ્રભુ નાવામાય વાતો કોઅયો, આહાન દુઃખ વેઠાડા એને ધીર રાખનામાય ચોક નમુના હુમજા.

¹¹ એઆ, આમા ધીર રાખનારાહાલ ધન્ય આખજેહે, તુમહાય અયુબા ધીરજા બારામાય તે વોનાલાજ હેય, એને પ્રભુવા પાઅને જીં આ ઇનામ મિલ્યાં આકોય બી જાય લેદાહા, જ્યાલ પ્રભુવા બોજ કરૂણા એને દયા પ્રગટ કોઅહે.

¹² બાકી ઓ મા બાહાબોઅયેહેય, બોદહાથી ઉત્તમ વાત ઈ હેય, કા કસમ નાંય ખાઅના, નાંય હોરગા કા દોરત્યે નાંય કાદે બિજયે વસ્તુહુ, બાકી તુમહે વાત કોઅના હાં તે હાં, એને નાંય તે નાંય ઓઅે, યાહાટી કા તુમા પોરમેહેરાથી ગુનેગાર નાંય ઠોરાવલા જાય.

બોરહાવાળી પ્રાર્થના તાકાત

¹³ જો તુમહેમાય ચોકતો દુઃખી ઓઅે તે તો પ્રાર્થના કોઅે, બાકી આનંદમાય ઓઅે, તે તો સ્તુતિગીતે આખે.

14 જો તુમહેમાય ચોકતો રોગી ઓઅ, તે મંડળી વડીલાહાન હાદે, એને ચ્યા પ્રભુવા નાવામાય ચ્યાવોય તેલ ચોળીન ચ્યાહાટી પ્રાર્થના કોઅ.

15 એને બોરહા પ્રાર્થનાથી રોગી બોચી જાઅરી એને પ્રભુ ચ્યાલ હારો કોઅરી, જો ચ્યાય પાપ બી કોઅયે ઓરી, તે પોરમેહેર ચ્યાલ માફ કોઅરી.

16 યાહાટી તુમા આપસમાય ચોક બિજા હામ્મે આપહે-આપહે પાપાહા કોબુલ કોઆ, એને ચોકા બિજા હાટી પ્રાર્થના કોઆ, જ્યાકોય હારાં ઓઅય જાહા, ન્યાયી માઅહા પ્રાર્થનાયે બો બોદી અસર ઓઅય હોકહે.

17 એલીયા ભવિષ્યવક્તાબી તે આમહે હારકો દુઃખ-સુખ બોગાવનારો માઅહું આતો, એને ચ્યાય પોતે પુરાં મોનાકોય પ્રાર્થના કોઅયી, કા વરહાદ નાંય પોડે, એને સાડે તીન વોરહે લોગુ દોરત્યેવોય વરહાદ નાંય પોડયો.

18 પાછી ચ્યાય પ્રાર્થના કોઅયી, તે આકાશામાઅને વરહાદ પોડયો, એને જમીનમાઅને પાક ઉસબાડયો.

19 ઓ મા બાહાબોઅયેહેય, જો તુમાહામાય ચોકતો માઅહું હાચ્યાયે વાટ છોડી દેય, એને જો કાદો ચ્યાલ પાછા ફેરવી લી યેય.

20 તે તુમહાન ઈ માલુમ રા જોજે, કા જો કાદો ચ્યા હાચ્યાયે વાટ છોડી દેનલા માઅહાલ પાછા ફેરવી લેય યેય, તે તો ચ્યા જીવ મોરણાથી બોચાડી, એને પોરમેહેર ચ્યા બોજ પાપાહાલ માફ કોય દેઅરી.

गामीत नोवो इरात
Bible in Gamit language of India

copyright © 2022 Beyond Translation

Language: (Gamit)

Contributor: Wycliffe USA

Read and download Bible and several other Christian materials in various formats : www.freebiblesindia.in

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-02

PDF generated using Haiola and XeLaTeX on 2 May 2025 from source files dated 2 May 2025

4883a606-3c54-5975-b41a-ca7f8faf825d